

BULETIN MIMBAR 2019

BIL 144 (01/2019) JANUARI-MAC

PERCUMA



KELAB MASJA-SA, LAKMNS
JUARA KARNIVAL SUKAN
AGENSI-AGENSI ISLAM



لِمَبَاجِنَةِ اَمَانَةِ كَبِيْرِيْكَوْ مَسْجِدِ نَجَارِيْ سَارَاوَك
LEMBAGA AMANAH KEBAJIKAN MASJID NEGERI SARAWAK

SIDANG REDAKSI

PENAUNG

Yang Berbahagia Tan Sri Datuk Amar Hajji Bujang bin Mohd Nor Setiausaha Kehormat Lembaga Amanah Kebajikan Masjid Negeri Sarawak

PENASIHAT

Tuan Haji Mohamad Sabry bin Haji Othman Pengurus Besar Lembaga Amanah Kebajikan Masjid Negeri Sarawak

EDITOR

Megawati binti Haji Julaihi Ketua, Sektor Pentadbiran dan Pengurusan

Nona Zaharia binti Fadzil Ketua, Sektor Korporat dan Kewangan

PENGARANG

Noratini binti Sebri Ketua, Bahagian Pengurusan Sumber Manusia

Haryati binti Mohamad Ketua, Bahagian Penyelidikan dan Pembangunan

Haji Poniman bin Margiman Ketua, Bahagian Keselamatan

PENOLONG PANEL EDITOR

Rahimah binti Ariffin, Guru MATTARY Misiah binti Wajhi, Guru MATTARY Azlyn binti Abdul Rahman, Guru MATTARY Nurul Iksan binti Bohari, Guru MATTARY

Wacana Pengarang

Dengan nama Allah Yang Maha Pemurah Lagi Maha Penyayang, syukur atas segala limpah kurniaan Nya kepada kita. Selawat dan salam buat Baginda Rasulullah SAW, kepada ahli keluarga Baginda, para sahabat Baginda.

Assalamualaikum warahmatullahi wabarakatuh

Assalamualaikum W.B.T. dan Salam Sayang buat pembaca yang budiman sekalian,

Rasa syukur kehadrat Allah SWT kerana dengan limpah kurnia dan inayah-Nya dapat kita bersua dalam Buletin Mimbar Edisi 144 bagi tahun 2019 ini.

Sidang pembaca yang dirahmati Allah SWT sekalian,

Sedekah amal jariah atau berwakaf membuktikan tanda kesyukuran kita kepada Allah SWT sebagai persediaan menghadapi alam akhirat sebelum kita meninggal dunia. Ini dibuktikan daripada Abu Hurairah R.A. berkata bahawa Rasulullah SWT bersabda yang bermaksud:

Apabila mati anak Adam (manusia), maka terputuslah amalannya kecuali tiga perkara iaitu sedekah jariah (wakaf), ilmu yang bermanfaat dan anak soleh yang mendoakannya. (Hadis riwayat Imam Muslim)

Di Malaysia, amalan bersedekah atau berwakaf ini semakin menjadi ikutan rakyat Malaysia tidak kira perseorangan maupun syarikat-syarikat korporat seperti wang tunai, saham, buku-buku, tanah, rumah, tanah dan sebagainya.

Dalam dunia digital dan globalisasi pada masa kini, pelbagai cara atau kemudahan bagi sesiapa yang mahu berwakaf seperti berwakaf melalui platform dalam talian (online) atau aplikasi-aplikasi yang disediakan oleh badan-badan wakaf di telefon pintar.

Akhir kalam, kita sebagai umat Islam hendaklah membelanjakan harta ke jalan Allah dengan berwakaf untuk mendapatkan keredhaan serta ganjaran yang berganda yang diterima daripada Allah SWT di akhirat kelak seperti mana firman Allah SWT dalam Surah al-Baqarah, ayat 261 yang bermaksud:

Bandingan (derma) orang-orang yang membelanjakan hartanya pada jalan Allah, ialah sama seperti sebiji benih yang tumbuh menerbitkan tujuh tangkai; tiap-tiap tangkai itu pula mengandungi seratus biji. Dan (ingatlah), Allah akan melipat gandakan pahala bagi sesiapa yang dikehendakiNya, dan Allah Maha Luas (rahmat) kurnia-Nya, lagi meliputi ilmu pengetahuan-Nya.

In Sha Allah.

KANDUNGAN

06



07



- | | | | |
|----|---|----|---|
| 4 | DARI HULU KE MUARA
Masjid Darul Ikhwan, Kampung Muara Tebas, Kuching | 20 | Karnival Sukan Agensi-Agenzi Islam 2019 |
| 5 | Imarah Masjid & Surau | 21 | Pewujudan Unit Psikologi Dan Kaunseling, LAKMNS |
| 6 | Majlis Perbarisan Tamat Latihan Kursus Asas Polis Bantuan LAKMNS, Siri 2 | 22 | Profil Warga LAKMNS |
| 7 | Hari Sukan MATTARY 2019 | 27 | Sudut Hafiz Cilik |
| 8 | Taklimat Ibu Bapa Murid Tahun 1 MATTARY | 28 | Profil Warga LAKMNS |
| 9 | Taklimat Bersama Ibu Bapa Murid-murid Tahun 6 MATTARY 2019 | | |
| 10 | Taklimat Ibu Bapa Untuk Kemasukan Murid 6 Tahun Ke MATTARY Tahun 2020 | | |
| 11 | Suntikan Imunisasi | | |
| 12 | Persediaan Persaraan Melalui Caruman Kumpulan Wang Simpanan Pekerja (KWSP) | | |

**BULETIN MIMBAR
EDISI 144 JAN-MAC 2019)**

HULU KE MUARA

BAHAGIAN MASJID-MASJID

MASJID DARUL IKHWAN, KAMPUNG MUARA TEBAS KUCHING, SARAWAK

Masjid Darul Ikhwan yang terletak di Kampung Muara Tebas, Kuching merupakan salah satu masjid di bawah seliaan Majlis Islam Sarawak.

Atas jasa dan inisiatif Ahli Parlimen P.193, Yang Berhormat Dato' Sri Dr. Haji Wan Junaidi bin Tuanku Jaafar. Bangunan baharu Masjid telah siap dibina pada tahun 2015 dengan keluasan bagi 1.3 ekar atau 5,265 meter persegi bagi menggantikan bangunan lama yang telah dibina atas tanah wakaf sejak era tahun 1950 an lagi.

Masjid ini mampu memuatkan seramai 275 jemaah dan 520 jemaah sekiranya menggunakan ruang limpah dalam satu-satu masa.

Bangunan Masjid Darul Ikhwan ini mengambil ilham daripada senibina Moorish. Ia dapat dilihat melalui reka bentuk gerbangnya. Selain itu, reka bentuk masjid ini juga mengambil kira aspek pengudaraan dan pencahayaan semulajadi bagi memberi keselesaan kepada para jemaah.



BANGUNAN TERKINI MASJID DARUL IKHWAN KAMPUNG MUARA TEBAS (MDIKMT)

Kemudahan yang terdapat dalam bangunan Masjid Darul Ikhwan ini ialah ruang solat, mimbar, bilik mesyuarat, utiliti, dapur, tempat wuduk dan tandas, sistem siaraya dan multimedia, Ramp sebagai laluan Orang Kelainan Upaya (OKU) serta tempat letak kenderaan yang luas.

Antara program yang dilaksanakan sejak tahun 2015 ialah Majlis Ibadah Korban Perdana, Majlis Sumbangan Kebajikan Hari Raya Aidilfitri dan Berbuka Puasa, Ceramah Perdana Hal Ehwal Islam yang disampaikan oleh Dato' Ustaz Kazim bin Elias anjuran Jabatan Agama Islam Sarawak serta pelbagai program lain yang menfokuskan pengimaranan masjid.



BANGUNAN LAMA MASJID DARUL IKHWAN KAMPUNG MUARA TEBAS (MDIKMT)



PROGRAM PENGIMARAHAN MASJID YANG DIANJURKAN OLEH PIHAK LAKMNS

Imarah MASJID & SURAU

Kesinambungan Program Lawatan Silaturahim, Penyebaran Maklumat dan Pengimaranan Masjid dan Surau oleh Unit Penyelaras Kegiatan, Bahagian Masjid-masjid, Lembaga Amanah Kebajikan Masjid Negeri Sarawak (LAKMNS) diteruskan dalam bulan Januari hingga bulan Mac 2019.

Sehubungan dengan itu, beberapa buah masjid dan surau telah dikunjungi sempena program ini yang bertujuan untuk mengeratkan jalinan ukhuwah di samping berkongsi maklumat mengenai LAKMNS.

Antara destinasi yang diziarahi ialah :

1. **Masjid Al-Muhajirin, Ladang Sampadi 01, Kompleks Perumahan Felda, Lundu – 25 Januari 2019**
2. **Masjid Darul Naim, Kampung Moyan Laut, Asajaya – 8 Februari 2019**
3. **Masjid Darul Iman, Kampung Senari, Kuching – 15 Februari 2019**
4. **Masjid Darul Ikhwan, Kampung Muara Tebas, Kuching – 22 Februari 2019**
5. **Masjid Nurhidayati Salam, Kampung Gobielt, Kuching – 15 Mac 2019**
6. **Masjid Baitul Rahim, Kampung Kolong 2, Kuching – 22 Mac 2019**

Antara pengisian Program Lawatan Silaturahim, Penyebaran Maklumat dan Pengimaranan Masjid dan Surau ialah ucapan aluan oleh Jawatankuasa Masjid dan Surau, taklimat ringkas mengenai latar belakang, peranan serta aktiviti LAKMNS dan tazkirah agama mengenai Kepentingan Mengimarhan Masjid yang telah disampaikan oleh Ustaz Hanif bin Isa dan Ustaz Zaimi bin Sakawi, Pegawai, Unit Penyelaras Kegiatan.



Masjid Al-Muhajirin, Ladang Sampadi 01, Kompleks Perumahan Felda, Lundu



Masjid Darul Naim, Kampung Moyan Laut, Asajaya

Masjid Darul Iman, Kampung Senari, Kuching

Masjid Darul Ikhwan, Kampung Muara Tebas, Kuching

MAJLIS PERBARISAN TAMAT LATIHAN KURSUS ASAS POLIS BANTUAN SIRI 2/2018

Bahagian Keselamatan, LAKMNS telah menghantar seramai 26 orang anggota, iaitu 21 orang anggota lelaki dan 5 orang anggota wanita untuk menjalani Kursus Asas Polis Bantuan Siri 2/2018 di Pusat Latihan Polis (PULAPOL) Kuching selama 63 hari (2 bulan 3 hari).

Dalam tempoh 63 hari tersebut, Pelatih Polis Bantuan telah didedahkan dengan latihan luar yang merangkumi latihan kawad, menembak, renang dan seni pertahanan diri. Selain itu, mereka turut memasuki kelas akademik yang meliputi pelajaran undang-undang kepolisan.

Semua pelatih Polis Bantuan termasuk anggota Polis Bantuan, LAKMNS turut diberi ujian untuk latihan luar seperti kawad dan menembak serta menduduki peperiksaan yang berkaitan dengan undang-undang kepolisan.

Pada 19 Januari 2019, Majlis Perbarisan Tamat Latihan Kursus Asas Polis Bantuan Siri 2/2018 telah diadakan di Padang Kawad PULAPOL Kuching. Wakil-wakil daripada pihak LAKMNS yang hadir ialah Tuan Haji Poniman bin Margiman, Ketua Bahagian Keselamatan, Puan Noratini binti Sebri, Ketua Bahagian Pengurusan Sumber Manusia (Group HR LAKMNS), serta Pegawai Bahagian Keselamatan, LAKMNS.

Anggota Polis Bantuan, LAKMNS, iaitu Konstabel PB97070 Muhd Ridhzuan Hakimi bin Mohd Khairy telah mendapat anugerah Pelatih Terbaik bagi Latihan Luar dan menunjukkan prestasi yang memberangsangkan sepanjang latihan dijalankan.

Tahniah dan syabas diucapkan kepada semua anggota Polis Bantuan, LAKMNS kerana telah menjalani kursus dengan jayanya.



HARI SUKAN 2019 MA'HAD TAHFIZ TUN ABDUL-RAHMAN YA'KUB

Hari Sukan Ma'had Tahfiz Tun Abdul-Rahman Ya'kub (MATTARY) Kali Ke-8 atau dikenali sebagai SUKMATTARY telah diadakan pada 20 dan 21 Februari 2019 bertempat di Stadium Mini, Sekolah Pendidikan Khas (B), Matang, Kuching.

Objektif utama SUKMATTARY dianjurkan adalah untuk menyahut saranan kerajaan agar setiap murid bergiat aktif dalam kegiatan sukan serta dapat membina keyakinan diri dalam persaingan yang sihat.

Acara yang dipertandingkan untuk hari sukan kali ini adalah mengikut tiga kategori iaitu kategori A (Tahun 6 dan Tahun 5), kategori B (Tahun 4 dan Tahun 3) dan kategori C (Tahun 2 dan Tahun 1).

Antara tetamu jemputan yang hadir ialah Puan Dayang Siti Aishah binti Haji Mohamad Atei, Wakil Ketua, Bahagian Pelajaran, Encik Abdullah bin Othman, Guru Besar, MATTARY, Encik Mohd Dzulkiffie bin Ai-ee, Penyelaras Program Hari Sukan MATTARY, Ustazah Fatimah Tuzzahrah binti Mat Som, Puan Azlyn binti Abdul Rahman, Puan Misiah binti Wajhi dan Cik Siti Zahrah binti Abdul Jalil.



Hari Sukan MATTARY telah dirasmikan dengan jayanya oleh Puan Dayang Siti Aishah binti Haji Mohamad Atei, Wakil Ketua, Bahagian Pelajaran. Acara lintas hormat setiap kontingen rumah sukan dimulakan dengan acara pertama dan diteruskan dengan pelepasan acara 100 meter Lelaki A dan Perempuan A.

Hari kedua pula, acara sukan diadakan di dalam dewan berikutan hari hujan. Walaupun diadakan di dalam dewan, keadaan masih terkawal kerana semua guru memberikan komitmen untuk memastikan hari sukan berjalan dengan lancar. Ibu bapa dan guru juga tidak ketinggalan menyertai acara tarik tali dan acara lari 100 meter.

Pemenang keseluruhan Hari Sukan MATATRY ialah Rumah Hijau sebagai Johan. Rumah Biru mendapat Naib Johan, Rumah Kuning mendapat tempat Ketiga dan Rumah Merah mendapat tempat Keempat. Johan untuk lintas hormat dan sorakan terbaik dimenangi oleh Rumah Hijau.



TAKLIMAT IBU BAPA MURID TAHUN 1 2019

Taklimat untuk ibu bapa murid Tahun 1 Ma'had Tahfiz Tun Abdul-Rahman Ya'kub (MATTARY) telah diadakan pada 12 Januari 2019 bertempat di Bilik Kuliah, Pusat Pengajian Al-Quran Tun Abdul-Rahman Ya'kub (PATARY).

Tujuan taklimat ini diadakan adalah untuk memaklumkan berkenaan kurikulum sekolah yang terbahagi kepada dua (2) iaitu kurikulum hafazan dan kurikulum akademik. Selain itu, ibu bapa turut dimaklumkan tentang hal ehwal murid di sekolah serta aktiviti kokurikulum seperti kelab dan aktiviti sukan yang ditawarkan kepada semua murid MATTARY.

Taklimat yang dihadiri oleh semua barisan pentadbir MATTARY yang dimulakan dengan ucapan bacaan doa, diikuti oleh ucapan alu-aluan daripada Cikgu Abdullah bin Othman, Guru Besar MATTARY. Cikgu Abdullah juga menyampaikan taklimat berkenaan dengan hal ehwal murid yang antara lainnya ialah peraturan sekolah yang harus dipatuhi oleh murid MATTARY.

Taklimat diteruskan dengan penyampaian maklumat daripada Ustazah Fatimahtuzzahrah, Penolong Kanan Al-Quran yang menerangkan berkenaan dengan pembelajaran hafazan di MATTARY. Untuk Silibus hafazan MATTARY tahun 1, penekanan akan diberikan dalam memperelokkan bacaan al-Quran dan Iqra' dalam tempoh 3 bulan pertama sebelum mensasarkan silibus sebenar MATTARY dimana tahun 1 perlu menghafal 2 juzuk iaitu 29 dan 30 serta surah-surah pilihan. Sasaran minima sekurang-kurangnya 1 juzuk setahun.

Taklimat Kokurikulum telah disampaikan oleh Cikgu Siti Zahrah binti Abdul Jalil berkenaan aktiviti renang, taekwondo untuk murid-murid tahun 1. Selain itu, beliau turut menayangkan gambar-gambar sekitar aktiviti renang dijalankan pada tahun lepas serta barang-barang keperluan untuk aktiviti tersebut.

Selesai sesi taklimat, sesi soal jawab daripada ibu bapa turut dibuka dan setiap persoalan yang dikemukakan dijawab secara profesional serta diterima baik oleh ibu bapa yang hadir.



IBU BAPA YANG HADIR MENDAFTAR DI MEJA PENDAFTARAN.




BARISAN PANEL JEMPUTAN PADA HARI TERSEBUT.



TAKLIMAT BERSAMA IBU BAPA MURID-MURID TAHUN 6 MA'HAD TAHFIZ TUN ABDUL-RAHMAN YA'KUB (MATTARY) 2019

Pada 26 Januari 2019, hari Sabtu, Ma'had Tahfiz Tun Abdul-Rahman Ya'kub (MATTARY) telah mengadakan Program Taklimat Bersama Ibu Bapa Murid-murid Tahun 6 pada 26 Januari 2019 bertempat di Bilik Kuliah, Pusat Pengajian Al-Quran Tun Abdul-Rahman Ya'kub (PATARY).

Objektif utama program taklimat ini diadakan adalah bagi menyampaikan maklumat berkenaan Pelaporan Pentaksiran Sekolah Rendah (PPSR) bermula tahun 2019 serta menerangkan maklumat tentang kepentingan Pentaksiran Aktiviti, Jasmani, Sukan dan Kokurikulum (PAJSK) bagi murid-murid.



CIKGU ABDULLAH BIN OTHMAN, GURU BESAR MATTARY MEMBERIKAN UCAPAN ALU-ALUAN KEPADA IBU BAPA MURID-MURID TAHUN 6 MATTARY

Taklimat tersebut dimulai dengan ucapan alu-aluan Cikgu Abdullah bin Othman, Guru Besar MATTARY. Kemudian, diteruskan dengan penerangan PPSR 2019 oleh Cikgu Azlyn binti Abdul Rahman, Penolong Kanan, MATTARY. Cikgu Azlyn turut menerangkan berkenaan pelaksanaan Pentaksiran Bilik Darjah (PBD). Seterusnya, disusuli dengan taklimat PAJSK oleh Cikgu Siti Zahrah binti Abdul Jalil, Penolong Kanan Kokurikulum MATTARY dan taklimat Ujian Psikometrik yang melibatkan Pentaksiran Psikometrik (PPsi) oleh Cikgu Nur Wahida Syafiqah binti Shazali.

Sesi taklimat juga diteruskan dengan penerangan berkenaan format mata pelajaran PPSR bagi tahun 2019 oleh Cikgu Rahimah binti Ariffin. Taklimat terakhir pula disampaikan oleh Ustazah Fatimahtuzzahrah binti Mat Som, Penolong Kanan Al-Quran MATTARY berkenaan Kurikulum Tahfiz dan pelaksanaannya untuk murid Tahun 6, MATTARY. Taklimat diakhiri dengan slot soal jawab bersama ibu bapa.

TAKLIMAT IBU BAPA UNTUK KEMASUKAN MURID 6 TAHUN KE MATTARY 2020

Taklimat Ibu bapa untuk kemasukan murid 6 Tahun Tadika Tahfiz Tun Abdul-Rahman Ya'kub (TATTARY) ke Ma'had Tahfiz Tun Abdul-Rahman Ya'kub (MATTARY) pada tahun 2020 telah diadakan pada 23 Februari 2019 bertempat di Bilik Kuliah, Pusat Pengajian Al-Quran Tun Abdul-Rahman Ya'kub (PATARY).

Taklimat telah disampaikan oleh Puan Afnalizan binti Ali, Penyelia TATTARY dan Cikgu Abdullah bin Othman selaku Guru Besar MATTARY.

Objektif utama taklimat ini adalah sebagai satu medium untuk memberi penerangan dan pemahaman yang lebih jelas berkenaan proses kemasukan serta kelayakan bagi anak-anak 6 tahun TATTARY yang berhasrat untuk meneruskan pembelajaran di peringkat sekolah rendah di MATTARY bagi sesi persekolahan 2020.

TATTARY dan MATTARY merupakan Tadika dan Sekolah Rendah Swasta Dwikurikulum yang memberi pengkhususan dalam bidang pendidikan tafzil al-Quran sebagai program pendidikan utama iaitu di dalam program Kurikulum Tahfiz Al-Quran Bersepadu (KTAB).



Selain itu, akademik juga dititikberatkan dengan penggunaan Kurikulum Standard Prasekolah Kebangsaan (KSPK) dan Kurikulum Standard Sekolah Rendah (KSSR) pada tahun 2020 telah diadakan pada 23 Februari 2019 sebagai panduan dalam melaksanakan pembelajaran akademik.

Antara pengisian taklimat adalah berkisar tentang jenis penilaian yang akan diuji terhadap calon iaitu hafazan dan akademik. Dari aspek hafazan, anak-anak akan diuji surah-surah di dalam Juzu' ke 30 al-Quran iaitu daripada Surah an-Naba' sehingga al-Fatiyah. Manakala, untuk aspek akademik pula, anak-anak akan dinilai secara bertulis dan lisan Bahasa Malaysia.

Selain itu, sesi soal jawab (Q&A) ibu bapa juga telah dikendalikan oleh guru MATTARY iaitu, Cikgu Azlyn binti Abdul Rahman, selaku guru akademik dan Ustazah Fatimahtuzzahrah binti Mat Som, selaku guru hafizah yang berkisar berkenaan persediaan untuk ujian saringan yang akan diadakan pada bulan September 2019 kelak.

SUNTIKAN IMUNISASI MURID TAHUN 1 DAN PEMERIKSAAN KESIHATAN MURID TAHUN 6

Ma'had Tahfiz Tun Abdul-Rahman Ya'kub (MATTARY) telah menerima kunjungan dari pihak Klinik Kesihatan Petra Jaya pada 21 Januari 2019 untuk memberikan suntikan imunisasi bagi murid Tahun 1 dan pemeriksaan kesihatan bagi murid Tahun 6.

Antara petugas yang datang pada hari tersebut ialah Dr. Zolhalmi bin Ahmad, Harun bin Mustapha, Pembantu Perubatan, Sh. Nasulia binti Wan Sakeran, Pembantu Perubatan dan Hajijah binti Redua, Pembantu Perubatan.

Semua ibu bapa murid Tahun 1 telah dimaklumkan berkenaan dengan program ini dan menyerahkan borang kebenaran bagi memudahkan pihak Jabatan Kesihatan mengetahui murid yang dibenarkan untuk menerima suntikan pada hari tersebut.



FAKTA IMUNISASI

Vaksin mengandungi antigen, yang diperolehi dari sebahagian atau keseluruhan struktur virus atau bakteria yang telah dimati atau dilemahkan. Antigen dalam vaksin berfungsi untuk merangsang sistem daya lawan jangkitan (sistem imuniti) tubuh membentuk imuniti terhadap jangkitan penyakit khusus.

Pada hari ini, kebanyakan vaksin adalah dalam bentuk kombinasi; iaitu beberapa jenis vaksin digabungkan dalam satu suntikan agar kanak-kanak mendapat perlindungan terhadap beberapa jenis penyakit dengan hanya satu suntikan. Ia menjadikan pemberian vaksin lebih praktikal dan kurang menyakitkan.

Persediaan Persaraan Melalui Caruman Kumpulan Wang Simpanan Pekerja (KWSP)

Persoalan berkenaan cukupkah simpanan persaraan untuk persediaan hari tua sering dipersoalkan dan kerap kali menimbulkan pemasalahan kewangan bagi sebilangan besar golongan pesara.

Berdasarkan kajian yang dijalankan oleh pihak Kumpulan Wang Simpanan Pekerja (KWSP), 69% ahli KWSP yang berumur 54 tahun pada tahun 2013 mempunyai simpanan RM50,000.00 dan ke bawah dan 50% pesara menghabiskan simpanan KWSP mereka hanya dalam tempoh 5 tahun.

Sedar akan kerunsingan ini, Bahagian Penyelidikan dan Pembangunan, LAKMNS telah mengambil inisiatif mengadakan satu taklimat berkenaan persediaan persaraan untuk kakitangan LAKMNS pada 7 Mac 2019. Kumpulan sasaran adalah dari golongan kakitangan yang berumur 49 tahun dan ke atas iaitu umur menghampiri kelayakan untuk membuat pengeluaran simpanan dari caruman KWSP. Seramai 25 orang peserta telah hadir yang terdiri daripada kakitangan LAKMNS dari pelbagai bahagian.



Gambar Hiasan

Wakil KWSP yang menyampaikan taklimat berkenaan persediaan persaraan kali ini adalah Encik Ronney Khairudin iaitu Pegawai dari Unit Khidmat Nasihat Persaraan, KWSP (*Retirement Advisory Service – RAS*). Beliau juga merupakan Perancang Kewangan Syariah yang bertaullah dan layak serta sesuai menyentuh berkenaan kaedah penyimpanan dan pengurusan berdasarkan syariah. Beliau turut menekankan agar pesara-pesara mengeluarkan caruman secara ansuran agar dana tersebut dapat membayai kos perbelanjaan dalam tempoh persaraan nanti.

Selain itu, pihak KWSP juga turut menyediakan kaunter bergerak untuk memudahkan para peserta dan kakitangan boleh membuat urusan KWSP seperti mengemaskini data penama dan mengaktifkan perkhidmatan KWSP secara dalam talian (online).



Adalah diharapkan agar taklimat ini dapat dianjurkan lagi pada masa-masa akan datang sebagai pengetahuan dan maklumat untuk membantu para peserta menguruskan simpanan persaraan mereka dengan lebih bijak dan sistematis.



Kursus Pra Perkahwinan

Dalam era globalisasi kini, perkahwinan sering dianggap sebagai perkara yang membebangkan. Kos perkahwinan yang menelan belanja ribuan ringgit itu sering menjadi igauan ngeri masyarakat terutamanya golongan muda. Tekanan ekonomi tanpa sedar sedikit sebanyak memberi kesan terhadap kehidupan bakal pengantin baik sebelum mahupun selepas berkahwin. Namun, adakah keadaan ekonomi semasa yang menjadi punca utama golongan muda takut berkahwin? Semestinya tidak.

Kita sering mendengar bahawa kos perkahwinan yang terlalu tinggi masa kini menjadi masalah bagi golongan muda untuk berkahwin. Apa yang menjadi tanda tanya, adakah perkahwinan itu harus mahal dan mewah? Ya, kita tahu jawapannya. Puncanya adalah nafsu yang berlebihan dalam berbelanja. Kita boleh memilih untuk mengadakan majlis yang ringkas dan jimat berbanding majlis yang mewah. Cuma mampukah kita berhadapan dengan satu persoalan yang sering menghantui fikiran kita, "kalau buat majlis ringkas sangat, nanti apa orang kata?"

Agama vs Adat

Islam agama yang mudah dan menyeluruh. Dalam Islam, perkahwinan itu mudah. Jika menepati semua rukun dan syarat yang ditetapkan syarak, pernikahan yang sah sudah boleh dilangsungkan dengan mengadakan walimatulurus atau sedikit jamuan untuk para tetamu yang hadir. Ia juga merupakan tanda syukur kepada Allah SWT yang telah mengurniakan kita pasangan hidup. Berbeza pula dengan adat, pasangan perlu mengambil kira banyak perkara sebelum majlis perkahwinan berlangsung. Sebagai contoh, Islam hanya menetapkan mas kahwin sebagai kewajipan yang wajib diberi pihak lelaki kepada pihak perempuan dalam perkahwinan. Tetapi menurut adat, perkara-perkara seperti wang hantaran, hantaran dulang, cenderamata tetamu, sewa tempat, pelamin dan persandingan sangat diambil berat. Ini kerana sesetengah masyarakat berpendapat bahawa perkahwinan hanya sekali seumur hidup. Apalah salahnya disambut dengan meriah sebagai tanda menzhirkan kegembiraan pasangan dan keluarga masing-masing.

Mampu vs tidak mampu

Walau bagaimanapun, tiada salahnya juga mengadakan majlis walimatulurus secara mewah jika pasangan pengantin itu mampu selagi tidak membawa kepada maksiat, pembaziran dan bertentangan hukum syarak. Mengadakan walimatulurus hukumnya sunat muakkad iaitu sunat yang sangat dituntut untuk dilaksanakan. Sabda Rasulullah SAW:

Maksudnya: "Adakanlah Walimah meskipun dengan seekor kambing."

(Hadith Bukhari dalam Sahih Bukhari no.2049)

Meskipun begitu, kita hendaklah berhati-hati dan berusaha memastikan majlis yang diadakan tidak mengandungi unsur-unsur syirik dan maksiat lebih-lebih lagi rasa ujub dan riya yang timbul kerana mahu menunjuk-nunjuk. Apa yang penting, elakkan berhutang demi kelangsungan hidup dan kebaikan masa depan. Moga kita dijauhkan daripada menjadi raja sehari tetapi hamba selamanya pada hutang.

Pelaksanaan Kursus Pra Perkahwinan Islam anjuran Lembaga Amanah Kebajikan Masjid Negeri Sarawak dengan kerjasama pihak Jabatan Agama Islam Sarawak adalah antara usaha untuk memberi pencerahan kepada masyarakat perihal ilmu perkahwinan sebelum mendirikan rumah tangga. Ia juga bertujuan mengubah paradigma masyarakat Melayu Islam khususnya di Sarawak terhadap upacara majlis perkahwinan menerusi pengisian Slot Akad Nikah dan Walimatulurus. Kursus Pra Perkahwinan Islam merupakan program bulanan yang diadakan di Bahagian Penyelidikan dan Pembangunan, LAKMNS sebagai medium untuk masyarakat khususnya pasangan yang bakal melangsungkan perkahwinan untuk menggarap ilmu rumah tangga. Selain itu, kursus ini juga menawarkan sijil kursus Pra Perkahwinan yang merupakan antara syarat keperluan dokumen yang perlu ada dalam prosedur permohonan perkahwinan.

Pada 19 hingga 20 Januari 2019; seramai 41 peserta, 16 hingga 17 Februari 2019; seramai 47 peserta dan 16 hingga 17 Mac 2019; seramai 62 peserta telah mengikuti kursus ini di Bilik Kuliah, Pusat Pengajian Al-Quran Tun Abdul-Rahman Ya'kub (PATARY). Para Penceramah yang terlibat dalam kursus ini ialah penceramah yang pakar dan berpengalaman dari Jabatan Agama Islam Sarawak (JAIS).

Kesimpulannya, kursus ini dapat memantapkan kesedaran dan penghayatan peserta dalam perjalanan melayari bahtera perkahwinan Islam. Semoga perkahwinan dan hidup setiap pasangan yang hadir diberkati Allah SWT selalu.

SEKITAR KARNIVAL SUKAN AGENSI-AGENSI ISLAM 2018



PASUKAN DART



PASUKAN BOLING



PASUKAN KAROM



PASUKAN SEPAK TAKRAW



PASUKAN BADMINTON



PASUKAN PENTAQUE



PASUKAN BOLA TAMPAR



PASUKAN PINGPONG



SERUAN MIMBAR

Khutbah Jumaat
(22 Mac 2019M/ 15 Rejab 1440H)
Sumber: <https://mis.sarawak.gov.my/>

“FARAID IALAH KETENTUAN ALLAH”

Kaum muslimin yang dirahmati Allah SWT,

Islam sentiasa mengambil berat tentang keadilan malah telah memerintahkan penganutnya untuk sentiasa berlaku adil dalam setiap amanah dan tanggungjawab yang dikerjakan. Setiap keputusan pula, hanya akan dikatakan adil, jika ia berpandukan dengan hukum Allah SWT iaitu al-Quran dan as-Sunnah. Ini ditegaskan oleh Allah SWT dalam firman-Nya melalui Surah an-Nisa', ayat 59 yang bermaksud:

Wahai orang-orang yang beriman! Taatlah kamu kepada Allah dan taatlah kamu kepada Rasulullah dan kepada Ulil-Amri (orang-orang yang berkuasa) dari kalangan kamu. Kemudian jika kamu berbantah-bantah (berselisih) dalam sesuatu perkara, maka hendaklah kamu mengembalikannya kepada (Kitab) Allah (al-Quran) dan (Sunnah) Rasul-Nya - jika kamu benar beriman kepada Allah dan hari akhirat. Yang demikian adalah lebih baik (bagi kamu), dan lebih elok pula kesudahannya.

Kaum muslimin yang dirahmati Allah SWT,

Ayat 59 dari Surah an-Nisa' ini jelas menerangkan kepada kita sekalian, dalam menghadapi apa juga permasalahan yang berlaku sepanjang kehidupan kita di dunia ini, khususnya yang melibatkan perkara yang berbentuk muamalat sesama manusia, sama ada yang masih hidup atau pun yang sudah meninggal dunia, agar kita juga berlaku adil. Ini bermakna, Allah SWT telah memerintahkan kita agar sentiasa berlaku adil dan berusaha bersungguh-sungguh mengikuti segala perintah-Nya sebagaimana yang telah diwajibkan kepada kita.

Allah SWT menegaskan lagi di dalam firman-Nya melalui Surah an-Nisa', ayat 11 yang bermaksud:

Sesungguhnya Allah menyuruh kamu supaya menyerahkan segala jenis amanah kepada ahlinya (yang berhak menerima), dan apabila kamu menjalankan hukum di antara manusia, (Allah menyuruh) kamu menghukum dengan adil. Sesungguhnya Allah dengan (suruhan-Nya) itu memberi pengajaran yang sebaik-baiknya kepada kamu. Sesungguhnya Allah sentiasa Mendengar, lagi sentiasa Melihat.

Kaum muslimin yang dirahmati Allah SWT,

Salah satu aspek penting dalam sistem muamalah Islam ialah faraid atau pembahagian harta pusaka orang Islam. Dalam menentukan hak ahli waris dan ashabul-furudh di dalam harta peninggalan si mati, kita juga hendaklah berlaku adil. Islam telah menetapkan dan menentukan, cara yang seadil-adilnya dalam pembahagian harta pusaka ini. Tidak ada cara yang lebih adil selain daripada apa yang telah ditetapkan oleh Allah SWT. Banyak dalil yang memerintahkan agar setiap harta yang ditinggalkan, dibahagi-bahagikan menurut hukum faraid.

Hukum faraid ini telah ditetapkan oleh Allah SWT lebih 1400 tahun yang lalu. Ia sentiasa relevan dari semasa ke semasa hingga hari kiamat. Jika kita membuka lipatan sejarah, bagaimana harta pusaka dibahagi-bahagikan sebelum kedatangan Islam, kita dapat hanya mereka yang kuat dan berkuasa sahaja yang berhak mewarisi harta tersebut, sedangkan yang lemah, seperti wanita dan anak-anak kecil, langsung tidak diberi hak untuk mewarisi harta peninggalan ibu bapa dan saudara-saudara lelaki mereka.

Kedatangan Islam telah mengangkat martabat, darjah dan kedudukan wanita ke tempat yang sewajarnya malah mereka yang lemah juga tidak terkecuali daripada mendapat perlindungan Islam. Mereka disetarakan untuk menerima pembahagian harta peninggalan si mati malahan mereka juga berhak mewarisi dan mendapat bahagian mereka masing-masing, sebagaimana yang telah ditentukan dalam hukum faraid.

Ini ditegaskan oleh Allah SWT melalui firman-Nya dalam Surah an-Nisa', ayat 11 yang bermaksud:

Allah perintahkan kamu mengenai (pembahagian harta pusaka untuk) anak-anak kamu, iaitu bahagian seorang anak lelaki menyamai bahagian dua orang anak perempuan.

Kaum muslimin yang dirahmati Allah SWT,

Dalam kehidupan kita di negara yang serba maju ini, di mana kebanyakan kita mempunyai aset seperti rumah, tanah, kereta dan lain-lainnya, dan menjadi suatu yang lumrah, pemilikan aset tersebut diperolehi dengan cara dan kaedah pinjaman menggunakan dua nama atau biasa kita sebut sebagai *joint-loan*. Bila berlaku kematian terhadap salah seorang dari pasangan ini, maka menjadi tanggungjawab ahli waris yang hidup, untuk membahagikan harta pusaka tersebut mengikut hukum faraid.

Bagi memastikan para ahli waris dapat melaksanakan pembahagian harta dengan seadil mungkin, kita digalakkan untuk merujuk perkara ini kepada Mahkamah Syariah. Ini disebabkan hanya Mahkamah Syariah sahaja yang berhak mengeluarkan perintah pembahagian harta pusaka, menentukan siapa waris yang berhak dan menentukan berapa bahagian kepada setiap waris. Dalam hal ini Mahkamah Syariah juga ada menyediakan laman sesawang atau website untuk mereka yang ingin mengetahui cara pembahagian harta pusaka dengan lebih terperinci lagi.

Sebelum pembahagian harta itu dapat dibuat kepada ahli-ahli waris yang berhak, kewajipan ahli waris pula hendaklah melaksanakan hak-hak keagamaan terhadap harta tersebut seperti membayar zakat, melunaskan kaffarah puasa, nazar, haji atau umrahnya dan menjelaskan hutang piutang si-mati, melaksanakan wasiat si-mati jika ada dan segala perbelanjaan pengurusan pengkebumiannya hendaklah juga diambil daripada harta si-mati. Jika semua perkara ini telah dilaksanakan, barulah baki harta itu dibahagikan kepada ahli waris yang berhak mewarisinya.

Perlu diingatkan bahawa, harta-harta peninggalan ini termasuklah wang simpanan, saham atau barang-barang yang berharga yang ditinggalkan atas nama si-mati.

Kaum muslimin yang dirahmati Allah SWT,

Hukum Faraid merupakan sebahagian daripada hukum-hukum Allah SWT yang telah diwajibkan kepada kita sekalian. Kita wajib memelihara dan melaksanakan hukum ini. Kita tidak mahu mengambil atau memakan harta yang bukan milik kita kerana perbuatan memakan harta orang lain secara batil merupakan suatu dosa besar dan dilaknat oleh Allah SWT

Marilah kita bersama-sama menghayati firman Allah SWT dalam Surah al-Baqarah, ayat 188 yang bermaksud:

Dan janganlah kamu makan (atau mengambil) harta (orang-orang lain) di antara kamu dengan jalan yang salah, dan jangan pula kamu menghulurkan harta kamu (memberi rasuah) kepada hakim-hakim kerana hendak memakan (atau mengambil) sebahagian dari harta manusia dengan (berbuat) dosa, padahal kamu mengetahui (salahnya).

Semoga Allah SWT sentiasa memberikan kita petunjuk, taufik dan hidayah-Nya dalam mencari keredaan-Nya. Semoga segala harta dan rezeki yang Allah SWT kurniakan kepada kita dan apa yang telah kita miliki, yang digunakan untuk keperluan kita sehari-hari, baik ke atas diri dan keluarga kita akan sentiasa bersih dari sumber-sumber yang syubhah dan haram. Kita berdoa kepada Allah SWT agar harta-harta yang kita telah miliki itu dapat kita manfaat ke jalan yang Allah SWT redhai. Aamiin Ya Rabbal 'Alamin.



Laman Psikominda

Kebimbangan Tanda Kesihatan Mental Terganggu - Edisi 1

Oleh: Nur Amirah Sharkawi, Unit Psikologi dan Kaunseling

Kebimbangan adalah emosi manusia yang normal. Setiap orang akan berasa bimbang pada masa-masa tertentu seperti berhadapan dengan situasi di mana kita akan merasa tertekan, contohnya berjumpa dengan ketua jabatan bagi menjawab persoalan tentang kerja, atau risaukan anak kita yang akan menduduki peperiksaan. Kesemua situasi seperti ini boleh menimbulkan kebimbangan di dalam diri kita. Perasaan bimbang ini perlu diurus dengan baik agar ia tidak memberi kesan negatif kepada kefungsian diri kita dalam menjalani kehidupan sehari-hari kita.

Apakah yang dimaksudkan dengan kebimbangan? Bagaimana pula dengan perasaan takut?

Kebimbangan dan rasa takut sering kali digunakan secara bersama dan dikatakan membawa maksud yang sama, namun hakikatnya kedua-duanya berbeza dan masing-masing mempunyai maksud yang tersendiri. Rasa takut ialah perasaan terhadap sesuatu yang boleh dilihat, dirasai dan diketahui boleh mendatangkan kemudarat. Manakala kebimbangan merujuk kepada persepsi tentang sesuatu yang merisaukan di dalam fikiran seperti sesuatu yang dikatakan, ‘Macam mana agaknya...?’ atau “Bagaimana sekiranya...” di mana fikiran-fikiran tersebut belum pasti dan hanya sangkaan yang wujud dalam benak fikiran kita. Contohnya, Abu, seorang posmen menaiki motosikal untuk menghantar surat ke suatu kawasan perumahan, tiba-tiba sekumpulan anjing liar mengejarnya dan Abu terpaksa melarikan diri untuk mengelakkan diri dari sebarang kejadian yang tidak diingini. Reaksi fisiologikal Abu ialah, jantungnya berdebar-debar, muka menjadi pucat dan tangannya menjadi seram sejuk. Itu ialah reaksi Abu apabila berdepan dengan situasi yang menakutkan. Contoh kebimbangan pula, katakan Aminah sedang membeli belah di sebuah pasaraya. Sedang memilih barang, tiba-tiba Aminah merasakan jantungnya berdegup kencang, tangannya berpeluh dan dadanya terasa sakit. Keadaan Aminah mungkin berlaku tanpa sebarang sebab dan ia berlaku secara tiba-tiba. Berdasarkan kepada kedua-dua situasi Abu dan Aminah, ketakutan adalah perasaan yang berlaku disebabkan kejadian sebenar yang berlaku secara realitinya, manakala kebimbangan wujud disebabkan sangkaan atau persepsi terhadap masa depan yang dicipta dan hanya wujud dalam fikiran individu sahaja.



Gambar Hiasan



Kadangkala kita terlalu memikirkan permasalahan yang berlaku sehingga kita kurang memberi fokus terhadap perubahan yang berlaku ke atas diri kita sama ada dari segi fisiologi mahupun emosi seperti mudah berasa marah, menjadi sangat sensitif ataupun sukar untuk tidur. Sebarang gangguan kepada kefungsian hidup sehari-hari kita menunjukkan adanya kesan yang tidak baik ke atas kesihatan mental kita. Dalam erti kata yang lain, seseorang itu sedang menghadapi gangguan mental akibat kebimbangan yang tidak ditangani dengan baik.



Persoalan timbul adalah kenapa tubuh kita bertindak balas sebegitu?

Sepertimana stres, kebimbangan juga bertujuan untuk melindungi kita dari sebarang bahaya. Ia merupakan reaksi melawan atau melaikan diri (fight or flight) dari sebarang ancaman. Mungkin kita pernah berhadapan dengan situasi di mana kita diganggu atau diancam, contohnya apabila kita hampir terlibat dengan kemalangan, tubuh kita akan bertindak balas dengan tujuan untuk menyelamatkan kita. Pada ketika itu kita akan memberi tindak balas emosi dan fizikal akibat dari ancaman berkenaan. Tindakbalas berkenaan adalah normal dan mempunyai tujuan yang baik, iaitu memastikan kita selamat. Walaubagaimanapun, sekiranya ancaman itu berpanjangan dan kadangkala tidak realistik, kerap berlaku dan mengganggu aktiviti sehari-hari, ia dilihat sebagai gangguan mental yang memerlukan satu tindakan penyelesaian yang segera.

Apakah tanda-tanda kita berada dalam keadaan bimbang yang melibatkan gangguan mental?

Apabila kita berada dalam keadaan bimbang yang tidak normal, kita boleh mengenal pasti keadaan berkenaan melalui tanda-tanda fizikal, mental dan emosi.

Antara tanda-tanda fizikal kebimbangan ialah jantung berdegup kencang atau rasa berdebar-debar. Ini disebabkan apabila kita merasakan diri kita terancam, hormon stres seperti adrenalin dirembeskan ke dalam saluran darah. Di samping itu juga, kita berkemungkinan akan mengalami keadaan di mana kita bernafas dengan cepat, rasa sakit pada bahagian dada, sukar menelan, menggeletar, muka menjadi pucat dan mungkin sakit perut. Rasa kering di dalam mulut juga mungkin dirasai kerana faktor badan bertindak menghantar cecair badan ke bahagian lain bagi mempersiap badan bertindak balas terhadap ancaman. Tanda-tanda ini walau bagaimanapun, perlu mendapat pandangan dan nasihat daripada doktor kerana turut dikhawatir simptom-simptom tersebut disebabkan penyakit fizikal yang lain.



Gambar Hiasan

Fikiran dan emosi kita akan turut terganggu disebabkan kebimbangan yang kita lalui. Apabila berada di dalam keadaan bimbang, kita akan berasa sukar untuk berfikir dan sukar untuk fokus terhadap apa yang kita sedang lakukan. Individu yang berada di dalam keadaan risau akan mudah merasa marah dan menjadi agresif. Kita akan menjadi mudah merasa dengan perkara-perkara remeh dan kadangkala menjadi marah akibat diusik oleh rakan, walaupun kebiasaannya kita bukanlah sebegitu. Apabila bimbang menyelubungi kita, kita sukar untuk bertenang dan secara langsung menyebabkan kita menjadi kelam kabut dan gopoh. Terdapat kemungkinan yang akan membawa kepada ketidakwarasan sekiranya kebimbangan menyebabkan ketakutan yang melampau dan hilang kawalan diri. Faktor seperti perubahan aliran darah, hormon, ketegangan otot, gangguan saraf mungkin menjadi faktor kepada keadaan berkenaan. Ada juga individu yang mempunyai keinginan untuk membunuh diri, kerana berada dalam kebimbangan yang terlalu lama menyebabkan timbul rasa putus asa dan kecewa. Individu berkenaan mula merasakan tiada penyelesaian terhadap apa yang dialaminya.

Karnival Sukan Agensi Islam Sarawak 2018

Bermula dari Oktober hingga November 2018 yang lalu, Kelab MASJA-Sa telah menghantar penyertaan dalam Karnival Sukan Antara Agensi Islam Sarawak.

Kelab MASJA-Sa telah menyertai kesemua acara yang dipertandingkan iaitu:

1. Ten-Pin Bowling
2. Dart
3. Sepak Takraw
4. Karom
5. Petanque
6. Badminton
7. Bola Jaring dan
8. Pingpong

Tahun 2018 sangat istimewa kerana secara keseluruhan, Kelab MASJA-SA telah berjaya merangkul gelaran sebagai Juara Keseluruhan untuk tahun 2018.



Berikut merupakan pencapaian Kelab MASJA-Sa di dalam KSAI 2018.

1. Dart - Juara
2. Sepak Takraw - Juara
3. Petanque - Juara
4. Badminton - Juara
5. Bola Jaring - Juara
6. Pingpong - Tempat kedua.
7. Ten-Pin Bowling - Tempat Ketiga
8. Karom - Peringkat kumpulan

Semoga kejayaan seperti ini dapat diteruskan pada tahun-tahun yang akan datang. Tahniah kepada semua yang terlibat.



PEWUJUDAN UNIT PSIKOLOGI DAN KAUNSELING, LEMBAGA AMANAH KEBAJIKAN MASJID NEGERI SARAWAK



Nur Amirah Sharkawi,
Pegawai Unit Psikologi dan
Kaunseling

Akademik:
1. Ijazah Sarjana Muda
Psikologi di University of
Canterbury, NZ (2013)

2. Ijazah Sarjana Psikologi
dan Kaunseling di Universiti
Kebangsaan Malaysia (2018)

Kelayakan:
Kaunselor berdaftar di
bawah Lembaga Kaunselor
Malaysia.

Unit Psikologi dan Kaunseling (UPKL) merupakan unit baru di bawah Sektor Pentadbiran dan Pengurusan Lembaga Amanah Kebajikan Masjid Negeri Sarawak (LAKMNS) yang telah ditubuhkan secara rasminya pada November 2018.

Tujuan penubuhan Unit Psikologi dan Kaunseling merupakan salah satu inisiatif pihak pengurusan LAKMNS bagi memangkin kesejahteraan dan membangunkan modal insan dalam kalangan kakitangan LAKMNS melalui pendekatan psikologi dan kaunseling.

Hal ini merupakan satu langkah yang dipercayai mampu menjana modal insan secara lebih menyeluruh dan holistik. Pengetahuan dan kemahiran menggunakan aplikasi psikologi dilihat sebagai sesuatu yang penting dalam usaha memperkasakan modal insan. Isu-isu yang sering berlaku dalam organisasi seperti masalah motivasi kerja, disiplin, integriti dan prestasi perlu ditangani secara berhemah dan bijaksana.



Tambahan pula isu-isu seperti ini sukar difahami kerana ia berhubung kait dengan faktor dalaman seseorang seperti sikap, nilai, kepercayaan, emosi dan pemikiran. Pengenalpastian masalah dan penyelesaiannya dipercayai dapat dilakukan dengan menggunakan kaedah-kaedah pendekatan psikologi yang bersesuaian dan keputusan perlu dihasilkan dengan efektif.

Pendekatakan psikologi dan kaunseling yang ditekankan oleh unit baru ini dalam usaha untuk membangunkan modal insan menekankan aspek seperti pembangunan, pencegahan dan pemulihan. Aplikasi psikologi dalam pengurusan kakitangan merupakan aktiviti yang menumpukan kepada elemen pemikiran, tingkah laku dan emosi individu di tempat kerja.

Aktiviti yang dijalankan merupakan usaha penambahbaikan berterusan terhadap pengurusan modal insan. Ia meliputi penilaian personel, pembangunan personel, penyelidikan dan intervensi. Seterusnya ia dapat meningkatkan keberkesanan pengurusan kakitangan dalam usaha mewujudkan suasana kerja yang kondusif dan harmoni.

Bagi mencapai matlamat ini, inisiatif untuk membangunkan dan memperkasakan modal insan ke tahap optimum di Lembaga Amanah Kebajikan Masjid Negeri Sarawak melalui aplikasi psikologi dan kaunseling perlu dilaksanakan oleh setiap peringkat dalam organisasi.

PROFIL KAKITANGAN

LEMBAGA AMANAH KEBAJIKAN MASJID NEGERI SARAWAK

Puan Haliza binti Haji Hafizan merupakan kakitangan pilihan pada edisi bulletin mimbar kali ini. Puan Haliza telah memulakan perkhidmatan di Lembaga Amanah Kebajikan Masjid Negeri Sarawak (LAKMNS) pada 5 Ogos 2009 sebagai Pembantu Tadbir dan kini penempatan beliau di Bahagian Penyelidikan dan Pembangunan, LAKMNS.

Anak sulung daripada 3 orang adik-beradik ini telah mendapat pendidikan di SK Rancangan Perumahan Rakyat 'RPR', SMK Semerah Padi, SMK Petra Jaya dan SMK Green Road. Selepas itu, beliau telah menyambung pelajaran di peringkat Diploma Mekanikal di Politeknik Kuching, Sarawak.



Beliau telah memilih Saidatina Siti Khadijah Al-Khuwailid RA serta Yang Amat Berbahagia Tun Dr. Siti Hasmah binti Mohamad Ali sebagai idola kerana bagi beliau, kedua-dua tokoh hebat ini merupakan insan yang sentiasa tekad untuk memperjuangkan prinsip hidup khususnya kepada agama Islam dan keluarga. Selain itu, kebijaksanaan tokoh-tokoh ini turut menjadikan Puan Haliza lebih matang dalam meneruskan kehidupan bersama putera kesayangannya iaitu Muhammad Danish yang berumur 6 tahun.

Sepanjang berkhidmat di LAKMNS, pengalaman manis yang tidak dapat lupakan ialah ketika beliau mengikuti program Kem Waja Diri Siri 2/2010 di Kem Askar Wataniah, Sematan, Lundu serta belajar berkenaan pengurusan fardu kifayah seperti pengurusan jenazah semasa di Unit Penyelaras Kegiatan.

Beliau turut menghabiskan waktu lapang pada hujung minggu dengan membaca novel dan berjalan-jalan bersama keluarga tercinta. Oleh yang demikian, besarlah harapan beliau agar LAKMNS sentiasa dalam rahmat dan lindungan Allah SWT.



Gambar ketika menyertai pertandingan ten pin bowling bersama kakitangan LAKMNS

PROFIL GURU MATTARY

LEMBAGA AMANAH KEBAJIKAN MASJID NEGERI SARAWAK

Haiyazi bin Roslan dilahirkan pada 4 Jun 1992 di Kuching, Sarawak. Beliau merupakan anak yang ke-6 daripada 7 orang adik beradik. Ayahnya Roslan bin Hassan kini sudahpun bersara dan ibunya pula hanya suri rumah sepuh masa. Pada 18 Ogos yang lalu, beliau telah menamatkan zaman bujang dengan menikahi gadis pilihannya yang bernama Nurazira binti Mohamad Zalmy.

Beliau mula mendapat pendidikan awal di Sekolah Kebangsaan Rakyat Tupong sebelum ke Sekolah Menengah Kebangsaan Petra Jaya. Beliau berjaya mendapat keputusan yang cemerlang dalam Sijil Tinggi Pelajaran Malaysia (STPM) dan seterusnya menyambung pengajian ke peringkat Ijazah Sarjana Muda di Universiti Putra Malaysia (UPM) dalam bidang Sarjana Muda Sastera (Bahasa dan Linguistik Melayu).



Beliau pernah bekerja di Kolej Vokasional Swasta JT Akademi selama setahun sebagai pensyarah. Kini, beliau menjawat jawatan sebagai guru akademik di Ma'had Tahfiz Tun Abdul-Rahman Ya'kub.

Haiyazi juga merupakan seorang yang sangat aktif dalam bidang sukan. Beliau pernah merangkul anugerah khas sukan sewaktu belajar di universiti. Pada tahun 2018, beliau dan juga ahli kumpulan yang lain berjaya mendapat johan dalam pertandingan sukan petanque dan sukan badminton sempena Karnival Sukan Agensi-agensi Islam di Sarawak.

Pelbagai pengalaman hidup yang berharga menjadi titik tolak kepada dirinya dirinya untuk terus maju. Beliau seorang yang mesra dan senang diajak berbual. Perwatakannya yang agak mesra membuatkan ramai pelajar senang untuk mendekatinya. Harapan beliau, semoga anak-anak Ma'had Tahfiz Tun Abdul-Rahman Ya'kub terus berjaya dalam apa jua bidang yang diceburi, seterusnya menjadikan al-Quran sebagai pedoman hidup.



Gambar bersama isterinya, Puan Nurazira binti Mhamad Zalmy



Gambar ketika menyertai pertandingan Pentanque sempena Karnival Sukan Agensi-Agenis Islam 2018



Cikgu Haiyazi bersama anak-anak murid MATTARY

PROFIL GURU TATTARY

LEMBAGA AMANAH KEBAJIKAN MASJID NEGERI SARAWAK



Umi Salmah binti Sahari dilahirkan pada 12 April 1992, di Kuching, Sarawak. Beliau merupakan guru al-Quran di Tadika Tahfiz Tun Abdul Rahman Ya'kub (TATTARY). Beliau mula berkhidmat di TATTARY pada 19 Mac 2018. Beliau merupakan anak ke tujuh daripada sembilan orang adik-beradik.

Beliau mendapat pendidikan awal di SK Temenggong, Kuching Sarawak. Kemudian menyambung di peringkat sekolah menengah di SMK Agama Matang sehingga tingkatan lima. Beliau kemudian menyambung pelajaran di peringkat diploma di Institut Kemahiran Islam Malaysia Sarawak (IKMAS) dalam bidang Pengajian Islam dan Dakwah. Setelah itu beliau meneruskan pengajian ke peringkat Ijazah Sarjana Muda Pengajian Islam dalam bidang Dakwah dan Kepimpinan di Universiti Kebangsaan Malaysia selama 3 tahun. Sepanjang pengajian, beliau pernah mengikuti program-program kemasyarakatan seperti Amali Dakwah di Perkampungan Orang Asli di Kelantan di bawah Jabatan Pengajian Islam (Dakwah dan Kepimpinan) UKM. Selain itu aktiviti kemasyarakatan lain seperti Bakti Siswa iaitu di bawah Persatuan Anak Sarawak (PEMASRA), UKM.

Sebelum berkhidmat di TATTARY, beliau pernah berkhidmat sebagai guru ganti di SK Matang sebagai guru Pendidikan Islam bagi prasekolah, 4 tahun dan 6 tahun. Pengalaman tersebut menyedarkan beliau akan tugas dan tanggungjawab seorang guru bukanlah sesuatu yang mudah malah memerlukan jiwa yang kental dan semangat yang kuat. Semasa mulamula berkhidmat di TATTARY, beliau belajar serba sedikit cara-cara untuk mengawal dan menarik minat kanak-kanak kecil untuk bersemangat dalam pembelajaran. Meskipun agak sukar, beliau menganggap ianya sebagai satu cabaran dan berusaha untuk menyesuaikan diri dengan bidang pekerjaannya sekarang. Beliau percaya, dengan ilmu al-Quran dan agama yang beliau dikongsikan kepada kanak-kanak boleh menjadi panduan dan berharap anak didiknya membesar menjadi insan yang berguna pada masa hadapan.



PROFIL PELAJAR MATTARY

LEMBAGA AMANAH KEBAJIKAN MASJID NEGERI SARAWAK



Zuhdi Altamis sewaktu menghadiri Majlis Konvokesyen di The University of Nottingham, Malaysia Campus.



Adik Zuhdi bersama keluarganya

1. Nama penuh : Muhammad Zuhdi Altamis b. Kasvenda
2. Tarikh lahir : 27hb Februari 2007
3. Tempat lahir : Kuching, Sarawak
4. Hobi : Bermain Bola
5. Cita-cita : Usahawan
6. Bilangan adik beradik: Anak bongsu daripada 3 orang adik beradik
7. Kejayaan yg dicapai :

2018 – Jayyid Jiddan Halaqah Imam Nafi' Al-Madani sempena Majlis Penyampaian Hadiah MATTARY 2018/ 1440 H

2018 – Peserta Pertandingan Hafazan Peringkat Negeri Sarawak anjuran PINTA Sarawak

2018 – Lulus Grade 1 Piano, The Associated Board of the Royal Schools of Music (ABRSM)

2017 – Tempat Ketiga Kategori Juzuk 26,27,28, 29,30 sempena Majlis Musabaqah Hafazan Al Quran Peringkat MATTARY 2017

2017 – Lulus Grade 1 Music Theory, The Associated Board of the Royal Schools of Music (ABRSM)

2017 – Sijil Green Tip/ Grade 6 Taekwando Malaysia (WTF).

2016 – Tempat Pertama Kategori Juzuk 27,28, 29,30 sempena Majlis Musabaqah Hafazan Al Quran Peringkat MATTARY 2016

2016 – Terbaik Hafazan (Pangkat Jayyid Jiddan Halaqah Imam 'Asim) sempena Majlis Penyampaian Hadiah MATTARY 2016/ 1438H

Aktiviti yg sering dilakukan di rumah : Bermain Video Game dan Menonton Youtube. Beliau merupakan peminat kartun BoBoiBoy dan selalu menonton siri tersebut melalui Youtube. Melalui tontonan video yang dihasilkan oleh Youtuber seperti Mr Kokom contohnya, pelbagai cerita berunsur nasihat diperolehi oleh Zuhdi Altamis.

Pada bulan Feb 2018 Zuhdi Altamis bersama keluarga bercuti ke Semenanjung untuk mengunjungi keluarga sebelah ibu di Selangor di samping melawat Bukit Gambang Water & Safari Park di Kuantan, Pahang. Sewaktu di Bukit Gambang pelbagai aktiviti dijalankan terutamanya di Water Park. Lawatan ke Safari Park dengan menaiki train juga merupakan sesuatu yang menyeronokkan. Pelbagai jenis binatang dapat dilihat dengan mata kasar sewaktu lawatan tersebut. Percutian itu sungguh bermakna kerana Zuhdi Altamis serta keluarga menghadiri Majlis Konvokesyen ibunya di The University of Nottingham Malaysia Campus pada 24 Februari 2018.



PROFIL PELAJAR TATTARY

LEMBAGA AMANAH KEBAJIKAN MASJID NEGERI SARAWAK



TATTARY merupakan salah sebuah pusat tafaz yang bakal melahirkan para hufaz yang berjaya suatu hari nanti. InshaAllah untuk kali ini, Buletin Mimbar menampilkan seorang lagi murid yang menuntut di TATTARY iaitu Nur Atikah Jamaliah binti Amd.

Lebih mesra dengan panggilan Jamaliah dalam kalangan ahli keluarganya. Merupakan anak ketiga daripada empat orang adik beradik. Berperwatakan ceria, petah berkata-kata serta suka menolong guru dan kawan-kawan.

Lahir pada 6 Januari 2013 di hospital umum Sibu. Bercita-cita menjadi seorang doktor. Sama seperti kanak-kanak lain Jamaliah gemar bermain masak-masak bersama adiknya. Menggemari makanan mi goreng dan minuman milo ais. Meminati warna ungu sebagai warna kegemaran. Jamaliah sentiasa disenangi oleh rakan-rakannya dan juga para guru. Harapan pihak TATTARY agar Jamaliah sentiasa cemerlang dalam mencapai cita-citanya suatu hari kelak. InshaAllah.



Sudut HAFIZ CILIK

BAHAGIAN PELAJARAN

FADHILAT MEMBACA SURAH AL-WAQI'AH

Setiap orang mengimpikan hidup yang senang dan seboleh-bolehnya tiada siapa yang mau hidup susah. Namun, jika kita ditakdirkan hidup susah anggaplah ia sekadar ujian daripada Allah SWT

Sesungguhnya ujian yang Allah SWT berikan itu mahu menjadikan kita seorang hamba yang lebih bersabar dan berubah ke arah kebaikan.

Surah al-Waqiah merupakan salah satu surah yang dikenali dengan penuh keberkatan serta memiliki banyak khasiat dan keutamaan yang besar.

Selain itu, surah al-Waqiah juga merupakan surah yang ke 56 dalam al-Quran, juzuk ke 27, mempunyai 96 ayat dan tergolong dalam surah makkiyyah. Dinamakan al-Waqi'ah bermaksud hari kiamat, diambil dari perkataan al-waqi'ah yang terdapat pada ayat pertama.

Dari ibnu masu'dr Rasulullah SAW bersabda; "sesiapa membaca surah al-Waqi'ah setiap malam, maka dia tidak akan ditimpa kesusahan atau kemiskinan selama-lamanya." (HR : al-Baihaqi)

Hadis di atas jelas menerangkan sekiranya kita selalu mengamalkan membaca surah al-Waqiah ini pada waktu pagi dan petang, In shaa Allah tidak akan papa kedana, rezeki sentiasa melimpah ruah dan segala urusan dipermudahkan.

Lagi dekat kita dengan Allah SWT, lagi Allah SWT kasihai kita. Perancangan Allah SWT sangat hebat, jadi jangan cepat mudah putus asa.



Gambar Hiasan



BORANG PENYERTAAN KELAS AL-QURAN DEWASA
ANJURAN PUSAT PENGAJIAN AL-QURAN TUN ABDUL-RAHMAN YA'KUB (PATARY)

PERHATIAN:

- I. Silakan boleh dengan tulisan yang telak dan benar-benar
- II. Sila setiaikan 1 salinan kad pengenalan.
- III. Yuan Penyertaan dikiraikan RM 50.00 setiap bulan
- IV. Bayaran yuan hendaklah dibuatkan pada seceder awal bulan

UNTUK KEGUNAAN PEJABAT:	:
NO. RESETH:	:
TARIKH TERIMA:	:
TARIKH/KOPI TERIMA:	:

MAKLUMAT DIRI

NAMA:	:
JANTINA:	:
NO. KAD PENCENALAN:	:
TARIKH LAHIR:	: UMUR:
ALAMAT:	:
NO. TELEFON:	:
TARAF PENDIDIKAN:	: (Pilihni) (Pilihni) (Pilihni)
ALAMAT MAJIKAN:	:
PEKERJAAN:	:

SILA TANDA '✓' PADA YANG BERKENAAN

KELAS ASAS:	:
KELAS PERTENGahan (TA'AWUD)	:
KELAS MAHIR (TARANNUM)	:

PERAKUAN PEMOHON

Saya mengaku bahawa semua keterangan di atas adalah benar dan akan mematuhi syarat-syarat yang ditetapkan oleh pihak pengajur.

Tarikh : _____ Tandatangan : _____

UNTUK PERTANYAAN SILA HUBUNGKU :
 NO. TEL : 082-443232 / 082-449813 (PUAN HARYATI BINTI MOHAMAD) / PUAN DAYANG MIZAWATI BINTI ABG TAH
 NO. FAX : 082-449815

RM100.00 SEORANG

BORANG PENYERTAAN

* Sila lengkapkan ruang kosong dibawah. Borang yang tidak lengkap akan dicadangkan.

NAMA:	_____	UMUR:	_____
NO. KAD PENGENALAN:	_____	NO. TELEFON:	_____
TARIKH LAHIR:	_____	PEKERJAAN:	_____
ALAMAT:	_____	ALAMAT MAJIKAN:	_____

TARIKH KURSUS YANG DIPILIH

* Sila tanda (/ ✓ /) pada kotak yang berkenaan.

- | | | |
|---|--|--|
| <input type="checkbox"/> 14 & 15 Januari 2018 | <input type="checkbox"/> 18 & 19 Februari 2018 | <input type="checkbox"/> 18 & 19 Mac 2018 |
| <input type="checkbox"/> 15 & 16 April 2018 | <input type="checkbox"/> 13 & 14 Mei 2018 | <input type="checkbox"/> 17 & 18 Jun 2018 |
| <input type="checkbox"/> 15 & 16 Julai 2018 | <input type="checkbox"/> 12 & 13 Ogos 2018 | <input type="checkbox"/> 9 & 10 September 2018 |
| <input type="checkbox"/> 14 & 15 Oktober 2018 | <input type="checkbox"/> 18 & 19 November 2018 | <input type="checkbox"/> 16 & 17 Disember 2018 |

TARIKH TUTUP PENDAFTARAN: 7 hari bekerja [seminggu] sebelum tarikh kursus bermula.

PERAKUAN PEMOHON

Saya mengaku bahawa semua keterangan di atas adalah benar dan akan mematuhi syarat-syarat yang ditetapkan oleh pihak pengajur.

Tandatangan: _____ Tarikh: _____



KURSUS
Dre Perkahwinan

ANJURAN LEMBAGA AMANAH KEBAJIKAN MASJID NEGERI SARAWAK
 DIKIRAS OLEH: JABATAN AGAMA ISLAM SARAWAK (JAYS)